



OPA JAM VERTÈLT 2016

Verhalen en gedichten geschreven door OpaJam uitgebracht op de website
't MestreechterSteerke.



15 JANUARI 2017
MESTREECHTERSTEERKE

INHOUD

Bladzijde 02 – 03	De Fauna tijdens de fiesdaog
Bladzijde 04 – 05	Vaan Mathijs tot Clara
Bladzijde 06	Vastelaovend 2015 / 2016
Bladzijde 07	Plestik
Bladzijde 08	Winter
Bladzijde 09 - 10	't Groet Mestreechs Dictee
Bladzijde 11 – 12	Vreugjaor
Bladzijde 13 – 14	Slek, Slek en nog 'ns Slek
Bladzijde 15 – 16	Sporte 2016
Bladzijde 17 – 18	D'n Awwer
Bladzijde 19 – 20	Keuning Willem Alexandertunnel
Bladzijde 21 – 22	Bleike Zwarte Piet
Bladzijde 23	Vaan 't Aajt nao 't Nuij



De Fauna tijdens de fiesdaog.

"Hé,Hé, eindelek rös", spraok de hin tegen de haon. "Wat höbbe veer weer mazzel gehad dit jaor en iech in 't bezunder", zag d'n haon.

Ze wandelde mèt nog get euverblievers nao de aofgelaope fiesdaog , door de ren. Eders kier es 't peurtsje, dat touwgaangk gief tot hun verblief ope góng, dachte ze; "nein neet weer hé" en sjrókke ze z'ch 't apezoer.

Zoen week of twie veur de Keersmes begós de familie traditioeneel aon hun jach op de levende have in hunnen hoof.

Heer, d'n haon, waor eder jaor 't ierste aon de beurt um in aonmerking te koume hun maoge te vólle. En eder jaor waor 't 't zelfde. Eder jaor waor heer hun altied weer te slum aof gewees, de familie boete aosem achterlaotend.

Oeteindelek sijnapde pa vaan de familie mer 'n hin. Dao waoren 'rs genóg vaan zag heer daan en dat waor gemekeleker vaange...

En daan te bedinke dat 't ganse jaor door d'n haon waor vètgemès.

Ze hadden 'm apaart gezat um te veurkaome dat heer z'n energie in plezieriger activiteite zouw steke. Oeteindelek hadde ze hinne genóg, vond pa.

Ouch de sjoete get wijerop in hun ren, lepe mèt de köp umhoeg zoe vaan wat kin us nog gebäöre..... Veurläöpeg waor de dreiging weer veur e jaor bedwónge.

Ouch de knijns dartele weer door de ren en es ze kóste zinge zouwe ze dat zeker gedoon höbbe, zoe blij zien ze. Zoe vaan."laot mer goon, laot mer goon, want te stèl is niks gedoon....."

't Hiel jaor weure die bieste betutteld. Op de sjoet - 't zuut toch zoe leuk oet - en mer geaaid weure, en mer geaaid weure...

Es de fiesdaog beginne draon te koume mote ze lètterlek renne veur hun leve en verdwijne einege vaan hun zonder aonzeens 'des biestes' mèt 'ne seerleke zwej in de braoiketel.

Lawweleerblajer, get azien, peperkook en e unneke debij, e tidsje pruttele en....'lek vinger lek dom...'. Wie die bies dao-euver dink weurt 'm neet gevraog.

Wat zit de mins toch gek inein.

De keersbuim, die in de gooj kamer sjoen waore opgetuig mèt de krib droonder, ligke boete op de stóp um opgehaold te weure en verbrandt. 4 Weke heet dee mage proonke naodat ze 'm oet 't bos höbbe gesloop. Mer jeh, 't waors wel gezèlleg...

Wat höbbe veer es mins toch allemaol de veur euver um 't gezèlleg te make en te höbbe. En is 't dat daan ouch?

Iech bin vaan meining dat de mins zellevers veur die gezèllegheid moot zörge. De hin, sjoet, knien, kwartel, patrijs, haon kinne dao ouch hun aondeil aon lievere! Es ze teminste nog aaibaar zien.....

Lekker ete huurt zeker bij 't gezèlleg samezien.

Wortelerats, andivie, spinazie, boerekuul, roed moos, sproete, slaaj. Boerum neet? Wat is dao mis mèt? HEERLEK.

Meh, bèste lezer(es) mèt alle respek veur de vegetariër ;

Ouch iech vin 'n hinnebats of 'n bats vaan 'ne knien, es iech 'm umgeve door allerlei sejskes en greuntes op m'ne teleur zeen ligke, neet te versmade.. Of 'n gevölde sjoet bring iech ech neet trök nao zien ren....'t Blijf toch genete.... Zeker zoe gezèlleg, ouch mèt de familie roontelum d'ch!

Wat zit 'ne mins toch gek inein...Heer of zie smikkelt wel vaan 'n vreemde hin of knien gekoch op de Mert, mer is heer/zie aofkomsteg vaan eige fauna vinde veer 't inins verdretig en zieleg....



Wat zitte veer toch raar inein.

Opajam.

Vaan Mathijs tot Clara

Mathijs woent oppe Boschstraot
Vindt drinke en springe mer euverdaod
En oppe Vriethof Servee en Jaan
Ouch die kinne niks devaan.

En Slevrouw ,op eus gezèllegste plein
Vindt hosse gaaroets neet fijn
En Theunis vaan Padua geworteld in Sjaan
Blijf t'n alle tije 'nen Italiaan

Treeske vaan Blauw Dörp
Hèlt ouch neet vaan dat beer-geslörp
En in Wolder mèt Pie en Pouw
Doen ze allein mer ,” knuddele in de mouw”

Michèl oet Heugem kin neet bevatte;
Heet niks mèt die Waterratte.
Lambèr is vaan 't Emmaplein verdreve
En moot same mèt Anna wijer door 't leve

Hoebèr, oondertösse weg oet 't Bosserveld
Deit ouch al neet mèt ; veur gein geld
Joezep oet Belfort en Martin in Wieck
Springe liever op kèrkmeziek.



Boerum goon zie neet in 'nen rijaloet ?
En mèt z'n allemaole 'ns lekker drop oet.
Door Mestreech en boetewieke, allemaol achterein
In 'ne Rijaloet wie 'ne boemeltrein

Mijters, kalötsje ,kap of gewoen, 'ne kale kop
Clara mèt de weurs onder d'n erm väärop
Wat kin daan nog gebäöre ...??
Dat Nelis oet Hare, Salvator oet Belfort en
Walburga oet Amie ziech ouch laope te besjääre !

Monnie en Gonnie zien e paar apaart
Kinne z'ch eve neet inhawwe en renne in volle vaart
Petrus oet Hier hèlt alles in han
En lègk mèt plezeer 't sjaggernere eve aon Ban

'T Mooswief oppe Mert, de Geis op 't pleinsje
Loupe hiel kóntent achterein, zjus wie e treintsje
Hun moot me nog heileg verklaore
Slörpe dus hiel veurziechteg aon 'ne jonge klaore
Mesjien stap ziene Hoegehoeglöstegheid op hun treinbordes
De kroen op hun viering, same mèt zien prinses

En is dat daan allemaol veurbij, laope de kèrke(hopelek) weer vol
Veur 't serieuze werk, nao al die daog oet de bol.....
Op Asselegoonsdag geit de mins ziech bezinne
En nao 't asselekruiske aon de Vastentied beginne.
En es Clara veur good weer heet gezörg
Weurt bij häör 'ne bougie bezörg..!!

*Eus stadspatroen, Sint Servaos, beloerde dat alles vaanoet de tories, hoeg bove
zien Mestreech
En zaog dat 't good waor
Oonderwijl sloog Grameer elf sleeg.....*

OPAJAM

VASTELAOVEND 2015/16

Iech moot 'ns nao d'n hoesarts goon
Vaan November tot Fibberwarie
kin iech neet mie rösteg op mien bein blieve stoon
D'n dokter zag; "Jao huur iech zeen 't good
Geer höb vaan alles en nog get in eur blood".

Sinds kort is dao confetti aon touwgevoog
En 't zaot al vol mèt Vastelaovend
Es m'ne blooddrökmeter teminste neet loog.
Ouch gief dee aon; eur blood zit vol meziek
Meh mins, daomèt biste e haaf jaor de Prins te riek...

Noe iech toch de inhajd vaan de blood bin aon 't mete,
Ouch de Mestreechter Geis zit dao-in
Wat hèt; de bis door dee Geis totaal bezete...
Mezieknote danse in d'n aojers en d'n hart sleit op hol
Wèlste dao vaanaof, gaank daan mer 'ns flink oet d'ne bol!

Ouch d'n dokter kraog, gein rös in mie lief, wat ze ouch
doog,
Ze duide, kneep, klopde en zo mie , de drökmeter sloog
door
Ze loerde bezörg en iech deeg alles wat ze m'ch vroeg
Toen kraog iech d'n oetslaag; 't zit in eur gene volges
miech
Geine arts, krijg dat oets oet eur lief, dink iech

Vastelaovend doorde nog neet zoe lang geleie mer drei
daog
Same mèt de pèlskes, tètèdevaux, friet, hiering en
gebakke vès,
zit 't neet allein in de blood mer ligk 't ouch op d'ne maog
Iech höb mer ein advies veur 'n ederein mèt die klachte
Drink mèt maote, zingk en spring 't droet, alle daog en nachte

**Höb geer op 't momint gein 'maote' veur 't viere vaan Carnaval
Tijdens Vastelaovend vindt geer ze ech everal....!!!**

Opajam



PLESTIK....



"Hallo Sjèr, Mia, Truus, komp noe nao binne.....
Um bij 't buffèt aon eur bestèld pèlske te kinne"
"Geit neet Sjeuf, veer hōbbe 'ne plestic beker"
"Maag geer daan neet nao binne daomèt? Is dat zeker?"



"Waar 't neet aandersum volges de wètgelierde
"Die luikes die noets boete Vastelaovend vierde?"
"Drinke die hunne wien soms ouch oet plestik?"
"Vinde zie wien drinke oet zoene kunsrumer wel gesjik?"



"Good, dus volges diech Sjèr :glaas BINNE..kunsstof
BOETE!"

"Jao en wèlsten 't zeker wete, loer daan eve door de
roete!"

"Inderdaad, iech zeen allein mer glaas in de hennekes!
Zoewie bij de vruikes es bij de hossende mennekes."



"O.k, veer koume nao binne en aon 't buffèt stoon"
"*dee echte gele batraof*", in e glaas wèlle veer neet
euversloon

Boete stoon einege notabele hunne wien al oet te speie..
Neet nao 't preuve, oh nein, zie wète hiel good um wat
veur reie....!

Conclusie;

Es veer ech allemaol, eus drenkske liever oet e glaas
wèlle drinke

Beer en Wien, laote v'r daan es 't glaas leeg is, us hiel
eve bedinke;



**Sjerve bringe gelök
Mer neet altied.....!!**

Opajam

Winter.....?

Winter, winter toch, boe biste?
Soms e bitsje kortbij
Soms hiel wied eweg
De plentsjes, pas te zien in Mei
Piepe al bove de grond
Miert, ze mote droonder zitte,
Wachtend op e lekker zönneke.
Pole regewater ,grijs wolke
De plentsjes snakke nao aosem
Hawwe de k(n)op zjus bove water.
Snie ,dé deke veur mojer eerd,
Vèlt euveral en nörges.
Vrere deit 't allewijl allein in
Zuuzaoete.
Winter boerum lieste us in de
steek?
De stievele wèlle veer oetlaote
D'n ope heerd aon.
De sjaatse onderbinde.
Oerklappe en beremöts op de kop.
Heise aon en sjerp um
lespiezele onder de neus,
En regepak... de kas in!
Veer kinne geine pool mie zien.
Betouwer ze um tot slebrik
Winter ,de bis eine vaan de veer,
De huurs ouch debij !
Blief toch neet eweg.
Verras us noe, al is 't eine kier!
Neet persee weke laank.....
De bis e sjiek en sjoen jaorgetij.
Mer daan mote veer d'ch wel veule
en zeker ouch zien.

KOM OP DE KINS 'T.....

Opajam





't Groet Mestreechs Dictee

Daor zaot iech daan, mèt nog zoen negenennegenteg aander 'dialeksrijvers' aon e täöfelke in 't Centre Ceramique, in alle rös te

wachte op 't moment suprême. 't Groet Mestreechs Dictee.

't Sjriefgerei in d'n aanslag, A-veerkes voor m'n neus.

Alleriers woort 't in zien gehiel veurgeleze door de sjrijver devaan. Daonao zin veur zin door de veurzitter vaan Veldeke Krink Mestreech wat geliek 't begin waor vaan 't sjrieve door de deilneumers.

Iech zal uuch vertèlle dat de wäörd die dit jaor opgesjreve moosde weure in mien vocabulair neet mie veurkoume. Neet mie!

Es iechtie in miene jöög oetspraak en m'ne pa hoort dat, moch iech de iers koumende week neet mie boete speule en nao 't aovendete nao bèd...! En Pa belaove dat iech die wäörd noets mie zouw oetspreke. Sjendaoleg vond heer dat. Umdat heer dit stökske toch neet mie kin leze - jaomer genóg....-dörf iech uuch noe wel daomèt te confrontere.

Labbedie- vèlt mèt -**Bavvie**- de ierste drej um mien oere ,dat moch toen nog, had iech te graze. **Kloetgoeje**...., "Dat zeet me neet"zouw heer daan zègke en "Boe höbste dat noe weer gehuurd?" **Pupse**- dat waor get , en noe nog, dao mooste oet loere ! 'ne Wel opgevoode zoon vaan ziene pa spraok euver ouge!

Pa zaog en huurde zien pedagogische kwaliteite, boe heer zoe gruuts op waor en boevaan heer dach dat 't wel resultaot zouw höbbe in de touwkoms, es snie veur de zon verdwijne.

En noe op 'ne zonnege zondagmörge, zittend in 't sjoenste gebouw op 't Ceramiqueterrein, n.b. mèt m'n ajdste kindskeend neve miech moosde iech en heer al die 'lieleke' wäörd vaan toen opsjrieve..... Wie vertèl iech 't mien kleinkinder? góng door m'ne kop.

Iech lag 'm veurzichtig de beteikenis vaan die wäörd oet. Iech zaog aon zien geziech dat dat totaal euverbodeg waors.

"Meh, ampa "zag heer, "sjei dao mer mèt oet."

"Of dach geer soms dat iech in e kloester zaot?"....."Dat heet mam m'ch al lang oetgelag mer iech maag die wäörd neet gebruke, zag mam debij."

"Dat zeet me zoe neet, jong", zag ze daan.....Zjus wie pa z.g. vaan miech indertied!!.....

"Veer höbbe 'ne moond en ouge en dat späöselke boe ze mèt 'get' goeje, liekend op "Jeux de Boules". "KLink netter of neet soms.?"

't Dictee sjoot al get op. '**Poejakkere**' in de '**Katsj**' en '**sjiethoes**' kaome nog langs mer dat lèste is ouch gebrukelek bij de keizer, de keuning en d'n admiraol. Dus gei commentaar.Ouch woort in 't dictee gefunkeld mèt 'krikkrak' Gedruugde kroedwösj bleek dat te zien, dee lekker lang brandde.

Achteraof gezeen waor 't lierzaam voor wat 't Mestreechs sjrieve betröf mer iech wach nog eve um 't te laote leze aon de allerjongste in de familie.Zie mote iers 'ns 't **ABM** oonder de knee kriege (ouch weer zoe'n raar gezègkde,zjus of de verstand in eus kneeholtes zit.....!)

t **ALGEMEIN BESJAOF MESTREECHS!!** Dát wèl iech doorgeveTot 't volgend jaor, zelfde plek aander dictee!

Opajam



VREUGJAOR

Blij en gestieveld , steeksjöp en reek oppe sjouwer en oonder e straalen zönneke, loup iech euver 't graas riechting m'ne moostem. Tijdens m'n veureg bezeug höb iech, 't in de wintermaonde door oonkroed

'euverwoekerd' stökske land in d'n hoof vaan mijn jongste dochter, maan en kinder ,al oonkroedvrij gemaak. Gespít en vaan koojemès en kalk veurzeen. D'n awwer begint al 'ne flinke rol te speule bij dat werkske. Veural tijdens 't spitte.'s Aovends hóng iech wie 'ne eerappelzak in m'ne zetel en vergóng vaan de pijn in de rögk. 'ne Heksesjeut waor m'ch euverkoume. Hekse moot iech zoe wie zoe neet. Lès zag 'ne kameraod tege m'ch dat heer e "Sprookjeshouwelek" had, "Verklaor d'ch naoder" zag iech dao-op. "Nouw" zag heer, "dat zal iech d'ch vertèlle, iech bin n.l. mèt 'n heks getrouwd.....!".

Nog neet zoe lang geleie doog iech dat spitte boe iech 't zjus euver had, 'mèt twee vingers in m'n neus'. Bij wijze vaan spreke daan. D'r moos jammers gespít weure en dat is mèt twee vingers in d'n neus ech neet te doen..... Daonao höb iech twee reikes redijskes gezejd, krölandievie geplant, en 'ne wiemele- en krónselestroek. Wie iech dat lès tege 'nen Hollender zag , dee neve m'ch aon d'n toog zaot, vroeg dee of iech soms 'n nui greunte had oetgevoonde en geplant..... Iech zag ; "Meh nein jong. Wiemele zien 'rode besse' en kroonsele zien 'kruisbesse'. Umsjakele vaan dialek nao 't ABN geit m'ch nog altied lesteg aof. Heerlijk veur op de vlaaj, die vruchte.". "OOH , maar dat doen wij niet in de vla, daar zitten vaak al vruchten in ", zag heer weer. "Doen veer ook neet m'ne bèste!, in de vla", góng iech wijer "Veer doen dat OP de VLAAJ! Lek vinger lek dom!"

Noe vèlt m'ch obbins nog get aandere in; Veurwat neume ze 'ne Mestrechteneer , los vaan 't bekinde Sjeng , 'ne "Reubeslikker" en 'ne Wiekeneer 'ne "Worteletikkker?" Zouwe die soms in vreuger jaore allemaol 'ne moostem gehad höbbe en oonderling de greunte höbbe gejat???? Um m'ch zellevers en de bove-Moerdijker neet nog mie in de taalperbleme te laote bringe, sjnoui iech mer gauw 'n aander oonderwerp aon. In 't A.B.N..... En 't is tegeneuver 'ne neet-Limburger ouch fetsojnleker. Op 't land zien de redijskes al lekker dik en sjoen roed mer de kröl-andievie moot nog get mie bleedsjes aonmake wèlle v'r genóg höbbe veur us tweeje um te ete..

De roei perelkes vaan 't land neum iech mèt nao hoes. Eve thoes laote zien en preuve wie wied m'n agrarische kinnes op dit momint al is gevorderd. Iech plant nog get roedmoos want oeteindelek deit verandering vaan spijs ete, neetwoer. Noe mer hope dat de slakke en aander oongesiever pas 't land op koume es iech de vröchte vaan m'n inspanninge al höb draofgehaold. Oonderwijl iech mien activiteite op 't land daon liet ouch de haon vaan ziech huure. *'Zoe gruuts wie 'ne pauw'* paradeert heer

door de ren. En terecht. Zien werk heet geleid tot 't oprope vaan 't moderlijk instink bij 'n hin die daan proomp kloek weurt geneump, en dat heet weer vief prachtege kuukes opgelieverd. Kloek en kuukes maken 't good..... Plante en bieste gedeie hei in d'n naoventrint prima. Dat is zeker.

Oonderweeg nao hoes bedink iech m'ch alvas dat lekker in d'n eige hoof zitte mèt e kaajd pèlske ouch get heet. Oeteindelek is 'röste ouch e wèrkwoord. Gek he. Vaan wèrke weurste jammers meu en dat is m'ch bij röste nog noets opgevalle.....

Evels ouch in euzen hoof; de plante die versjeie blomme aoflievere, stoon sjoen debel. Aofrikäönsjes, Zjeraniums, Petunia's, Azalea's, 'André Rieukes' (vioele zoe gezag...). zjus wie zien orkesleie , in allerlei kleure...bogonia's, ezw ezw.



Geweldeg dat Vreugjaar!! Um activiteite te oontwikkele en um te genete vaan al 't sjoens - en werk- dat dat jaorgetij mèt ziech mètbringk.... En dat is hiel get. Dus gaot euren gaank!

SLEK, SLEK en nog 'ns SLEK....

Zoe meu wie 'n maaj leet iech m'ch in de zetel veur de computer valle. Iech moosde nog get mailtjes versjikke. Boe waar iech noe zoe meu vaan? Zal iech uuch vertèlle... Wie iech op 'ne möрге d'n hoof inleep struukelde iech bekans euver 'n slek. En wat veur ein.... 'n Naakse. Daonao rondloerend , d'n hoof in.zaog iech niks anders daan slek. Naakse slekke - sijnbaar mèt hoesvestingsprobleme - en slek, hun hoes op hun rögk mètsleipend, duudelek zonder hoesvestingsprobleme. Iech prees m'ch gelökkeg, wie iech dat zaog, umdat veer, minse, dat toch beter geregeld höbbe.....'ne Rögkzak mètsleipe gief al perbleme, laot stoon e hoes....

Groete en klein loker in de blajer vaan de plante gaove al aon dat ze zich good vol hadde geg(vr)ete. Neet iers vraoge of ze dat wel mochte. Nein huur, gewoon beginne. Die slummerikke wiste natuurlek al dat ouch de luikes op deez eerd wel 'ns "e greun bleedsje lösde" op z'nen tied.... Mer die völde dat op hun eige meneer in. Dus, boerum zouwe zie dat neet mage? Mer wie krijgste dat oongesiever, dat hunne weeg markeert mèt e oonappetitelek sliemspoor, door 'n ordenteleke en milieuvrunteleke ingreep, oet d'n hoof?

De wèls toch neet dat es astrein 't good weer aankump tege haaf opgevrote plante aonloere. 't Heet allemaol geld genóg gekos. Euzen hoof is gein voedselbaank veur bieste die 'n mins liever zuut vertrèkke daan koume.

't Ierste wat iech vreuger vaan Pa zaoleger höb gelierd is, zaajt op die bies goeje. "Daan smèlte ze weg wie snie veur de zon...."zag heer op 't momint dat heer mèt e pak saajt in z'n han de slek riekeley bedeende daomèt. Noe laos iech op 'n website euver bestrijdingsmiddele dat dat 'n zier pienleke methood is um die kringe nao hun walhalla te kriege. Um hei te explicere boedoor, heet geine pas en zeker neet in e Contactblad van e dörp dat bekind steit um z'n Häöfdabbers en Häöfdabberinne in combinatie mèt d'n Häöf en hel wërke. Dus zaot niks anders drop daan ze te vaange.... of e aander verdelgingsmiddel te keze. Iech koos veur 't ierste. Dat waar

de reie boedoor iech zoe meu waor wie iech veur de computer góng zitte aon 't begin vaan dit verhäöselke.

Naodat de 46e in de GFT-bak waor verdwene bin iech gestop. Eine, dee zoe vrij waor m'ch in te hole tijdens 't renne achter 'ne aandere aon perbeerde m'ch nog puutsje te lappe. Zoonder succes euveregens..... Heer/zie deit op 't ogenblik mèt 'ne door de slek georganiseerde wedstrijd (dao liekend 't teminste op) wee 't ierste onder tegen d'n deksel vaan de GFT-bak zit. Dalek 'ns eve de stand vaan zake opneume.

Iech rappeleer m'ch obbins e möpke boe slek de hoofrol inhöbbe.

'n Vrouw wouw gere escargo's eten s'aovends

."Good sjat" zeet de maan. "De bis vendaog jaoreg en diech maags zègke wat veer ete". Heer doog z'ne palto aon en góng nao de supermert. "Wel veur zès oor trök!", reep ze häöm nog nao. Wie heer de slek had gekoch en de tuut, boe heer ze in had laote doen, in zien tes had gedoon trof heer 'ne awwe vrund. "Kom eve gezèlleg e pèlske drinke", zag dee. Zoe gezag zoe gedoon. 't Bleef natuurlek neet bij dat eint en 't woort mer later en later. Tege ach oor versjrók heer zoe vaan d'n tied dat heer gauw aofsjeid naom en nao hoes sjeigelde. Op zien kneje veur de vâördeur zittend, perbeerde heer de sleutel in 't sleutelgaat te kriege. De tuut mèt slek veel door dat gesukkel op de grond en spróng ope en dao laoge de slek....Op dat momint doog zien vrouw de deur ope,

"Boe bistiech gebleve? En iech mer wachte en mer wachte". Heer boog ziech riechting de slek en zag: "Excuus sjat" en riechting de slek:

"KOM MER JONGES ,NOG EVE DOORLAOPE VEER ZIEN D'R BIJNAO!!!....."

OPAJAM





Sporte2016

De sjeidsrechterfluitsjes zien stèl.'t Pebliek is nao hoes. De voetbalvelde in Fraankriek zien ingeruild veur de strande aon allerlei Costa's. De sportvelde, stadions en sportaccomodaties in Rio de Janeiro stoon leeg. Gein applaus, gein gejoel geine zaank um de sporters aon te moedege. Ouch geine sporter die mèt häör sportsjeun goejde umdat ze "mer"

zèlver had umdat ze op goud had gerekend. Of 'ne jenkende sporter die langer had wèlle mètdoen mer nao eine wedstrijd al waor oetgesjakeld. De medaaljes zien verdeild

Tijdens interviews gaove de dames en hieere sporters aon dat ze waore gekoume um nao 4 jaor intensieve training op zien mins 'n medaille mèt nao hoes zouwe neume. Allein bij de zwumsters en zwummers woord neet gejenk, nao al die teleurstèllinge. Gelökkeg mer. Hadde ze dat wel gedoon daan zouw 't bad boe-in ein en aander z'ch aofspäolde weure aofgekäörd veur wedstrijde, vaanwege te hoeg water.....

Ein dingk is zeker; sporte kóste ze wel mer gewoon teleurgestèld zien of blij zien mèt eige resultaot of bij dat vaan aander sporters dat mankeerde toch ech draon. Advies vaan 'ne leek; Lier iers ns de koumende jaore wieste teleurstèllinge - zoe-es ver lees of blessure - moos verwèrke.

Reken op niks, daan is eder resultaot e geweldeg resultaot. En vèltste in de medaaljes daan is 't e super resultaot. De natie geneet vaan uuch bij edere wedstrijd. Oongeach wat 't opbringk. Sport is veur d'n eine um de gezondheid vaan 't lief te bevordere en veur d'n aandere oontspanning um te genete vaan 't loere denao. En hopelek maag geer - de sporters- es beloening veur eure inzat, nao eur prestatie, op "de plaots delict" blieve um deginnege "die nog mote" aon te modege. Same oet same thoes!!

En wat is 't toch leuk um sjeidsrechter te zien. Zoe gauw es heer/ zie 't sjeidsrechtersfluitsje riechting moond bringk en daan ouch nog drop flöt, kin heer/zie 't bèste de ierste de bèste sjuilkelder op zeuke, nao binne renne, de deur op sloot doen en zoonder wijer nog geluid te make in e heukske te wachte tot de speulers weer riechting veld zien vertrokke. Althans zoe kump 't op de kiekers euver. Dit heet niks mie mèt sport te make. Bij Rugby - ein vaan de groofste sporte wat fysiek geweld betröf-, beslis de sjeids. Perbeer neet de gooje maan of vrouw tege te spreke daan is veur dee lèste de wedstrijd gedoon. Bij Hocky maagste bij 'n euvertreiding e paar minute goon 'oetröste' boete 't speulveld. Bij tennis kump bij twiefel euver de beslissing vaan de sjeidsrechter/lijnrechter de 'refery' zien, trepke oonder z'ne stoel aof rent nao de bal-aofdrök in dat roed spöl, (gravel) beslis of de bal binne of boete de lijn waors en rent weer via dat trepke trök nao zien steulke zoen anderhalve meter

bove 't speulveld. Soms ouch nog achtervolg door 'ne protesterende speuler.. 't Is oeteindelek noets good...!

't Is onderdehand 'ne algemeine tendens.

Es leidinggevende - in wat veur hoedanegheid daan ouch kinste gein beslissing zoemér neume. Alles weurt tegegesproke. De beslisser weurt behandelt es aajt voel en oetgesjolle. En boerum? Umdat die betreffende beslissing



soms samehingk mèt milioene euro's wel of neet verdene (kriege)! De centekes make 'n beslissing numme zoe meujlek. Iech höb respek veur deginnege die dat aondörve in deez huidege maotsjappij. Veer mote weer liere um gelökkeg te zien mèt wat veer höbbe en dao bovenop ouch nog get bereike. Moch dat lèste neet 't geval zien Dat höb iech bij herhaling gelierd tijdens de Olympische Speule, en vèlt dat wat veer bereik höbbe get tege, laote v'r daan eus situatie 'ns vergelieke mèt luiques die 't in de wereld minder höbbe getroffe.'t Journaal deid daogeleks verslaag daovaan.

Opajam

foto Olympische ringen van website [The Dudes](#), geld van website [Maastheater](#).

D'n AWWER.

Mèt 't stijge der jaore, zoe wie me dat zeet , weurt de bovekant vaan 't nachkeske qua oppervlakte eder jaor get kleiner veur al de atribuute die dao-op de nach doorbringe. Ei gedeilte vaan die spölkes make 't daogeleks leve aongenaomer e aander gedeilte deent veur ondersteuning um de nach good- zègk mer slaopend- door te koume.



Iech höb onderdehand 'n nachKAS nudeg um alles op en in kwiet te kinne. Heibove steit wel, dat eder jaor wel weer get debij kump, mer noe is 't al eder haaf jaor. Iech gaon neet opsjrieve wat dao allemaol opligk mer de luikes die mèt miech riechting de allersterkste onderweeg zien of al höbbe bereik, weite wel boe iech 't euver höb. Alles tösse 'ne brèl en steunzole die 't leve euverdaag get aongenaomer mote make zien op de nachkas te vinde. De steunzole blieve lekker zitte boe ze thoeshure n.l. in mien sjeun. Dit um 't milieu in de slaopkamer cq badkamer, neet te bederve. Mer m'ne leesbrèl en m'ne 'wiedkiekbrèl', boemèt iech wijeraof ouch get kin zien, ligke same mèt m'ne derde brèl, wel drop. Dee derde höb iech nudeg um die veurege twie te zeuke. Die bin iech nogal 'ns kwiet. Dus dee is ech hiel hel nudeg.

't Korte termijngeheuge zörg deveur dat iech koostant vergeet boe iech ze gelag höb..... Es iech nao de supermert gaon zonder kemissiebreefke, umdat iech nog altied dink dat iech dat wel oonthaw wat m'ch gevraog is mèt te numme....., kom iech oeteindelek allein met de krat beer thoes..... Sjijs ouch mèt de awwerdom te make te höbbe. Noe vin iech dat 't minste.



Ouch m'n huurapparaat ligk detösse. Dat daon iech oet umdat iech anders wakker weure vaan m'n eige aosemhaling. Dat verlöp neet bepaold geruusloos. Wie m'n dochter 'ns de kleinkinder vertèlde dat ampa kaom oppasse en bleef slaope reep d'n ajdste; "Nein he!", deid heer daan wel zien slaopkamerdeur touw zoedat iech ouch kin slaope....!!"

Zo, noe moot iech oetsjeie mèt op te numme wat allemaol op die nachkas ligk umdat aandere m'n privicy in 't gedrang kump.

De awwerdom kump mèt gebreke is 't cliché. Mer ouch zoe woer. Mer bèste luikes, truus uuch mèt de gedachte: 'n oplossing is naobij. Zeker noe de medische wereld zich zoe heet oontwikkeld dat ze bijnao euveral get veur höbbe.'n Apparaat veur zus en e medicijn veur zoe. In de sjeur höbbe veer al plaots gemaak veur de rollater. Heer is nog neet nudeg want wie 't woord al zeet; iech rol later noe nog neet....

Noe höb iech 't nog neet gehad euver al die pijnsjes. Zèt get awwer luikes bijein en binne de kortste kiere vlege boete de koffie, thee en vlaog ouch de ziektes euver de taofel. Mèt alle respek. Veer wèlle jammers wete ofste allein las höbs vaan pijn in de rögk, de kneeje, de nek de veu en de eeksteroug. En 't stump e bitsje tevreie este

huurste tot 'ne aandere in 't gezèlsjap ouch las daovaan heet. Daan veulste d'ch neet mie zoe allein mèt d'nen 'élend'. Soms es 't gesprek is beëindeg, veul iech m'ch 'nen haven dokter en/of aptieker onderwijl iech eigelek liever 'nen have of ganse boswachter of kunsteneer had wèlle zien.....

Wat iech ouch besef is dat iech vaan veur d'n oorlog bin. D'n twiede wereldoorlog wel te verstoon! Wat heet dat lief neet allemaol mote doorstoon. Wat höb iech al die jaore kinne doen zonder klachte. Wat kin iech vendaog d'n daag nog? Neet mie zoe wie vreuger. Zeker neet. 't

Geit allemaol get trager mer 't geit. Wieväöl luikes kinne dat neet mie mer zouwe dat wel gere wèlle?! Die gedachte allein al deit hiel vööl pijnsjes bijnao verdwijne. En maak d'ch zeker gelökkeger.



Bovestaond zien typisch Naojaorsgedachte. De natuur geit ouch jaarlijks e stepke of 'ne stap trök. Mer gief 't veurbeeld door in 't Vreugjaor weer op te bleuje.....



Iech geneet vaan wat iech nog kin en ouch nog vaan wat iech gekind höb!!en besef ouch dat dat jaomer genóg neet veur 'n ederein is weggelag.

Keuning Willem Alexandertunnel

Iersdaogs geit 't nao drei jaor daan toch gebäöre
Nog 'eve' de bijbehuurende techniek kääre
En de Keuning Willem Alexandertunnel is klaor
De A2 is op die plek neet mie wat ze waor!



Veur edere otomobilis dee nao 't Zuide en trök wouw
'n Crime of heer zien bestumming op tied hole zouw
Veurdad de wérklui mét bouwe kóste beginne
Moosde weer aander luikes ziech iers bezinne.

't Zouw hiel get apparts mote weure
Boe achteraoef niemes kós euver zeure
Uniek in Europa, in oetveuring en materiaalgebruuk
En boven drop, buim, graas, benk en struuk.

'De Greune Luiper' weurt de naam daovaan
All wandelend touwgaankelek veur Jan en allemaan.

Vootgengers en rolsteul mer oto's en
fietsers gesjeid daovaan
Ederein moch 't oonder de grond goon
bekieken
Want wat dao is gepresteerd vindt nörges
zien gelieke



Hoonderde vaklui hóbbe létterlek hun
'steinsje' bijgedrage
Zoedat oto's noe oonder de grond nao
hun doel kinne en mage.
Gein files,geine stress ,gein gevlook b.v.
'noondepie'
Nein huur, Mestreech bezörg al die luikes geine hinder mie

Meh Jeh es ederein oonder Mestreech doorrijdt zonder aof te sloon,
Daan is 't mét de economie in de stad gauw gedoon.
Dus gemeente zörg veur borde boe-op **WELKOM** kump,te stoon.
En; Bedink uuch veur geer d'n tunnel in wélt goon!!!

*Mestreech is wél breid en e bitsje laank!
Ei baar gezélligheid en lekker ete.
'n Stad die geit d'ch aon d'ne straank
De Mestreecheneer wélt dat ouch wel wete*

*Ouch de béste kaffee ligk in die stad
En restaurants mét hiel lekker ete
En die hadde uuch gere es klant gehad!*

*Versjeienheid aon winkels, en
monumentaole gebouwe*

*'n Bereumde frituur mét de lekkerste patat
Stap oet dat 'bleek', 't zal uuch neet
berouwe*

*Geneet vaan 't bourgondische en de de
mominte*

*Blijf e nechske euver mer pik iers nog e
terras*

*Deen tunnel dee wach wel dus drink lekker
nog e paar pinte!*



*Opajam. **Sjo.Vinis***

Foto's Koningspaar, MestreechterSteerke, Cafe Karkol website [Misset Horeca](#).



BLEIKE ZWARTE PIET....

Iech kin niks draon doen. 't Moot mer eve. De gezette stoon bol devaan, actualiteiterubrieke oppe tillevisie höbben 't dreuver, in gesprekke op verjaordaog geit 't neet mie euver 't flesverke, op 't werk kinne ze ouch gei fetsojnlek aander gespreksoonderwerp vinde, tijdens de koffie thoes, in winkels en lui onderling die z'ch tegekoume in dörp en stad, 't geit allein mer

euver, zjus, ZWARTE Piet.

En de kinder die zoevööl plezeer beleve aon dat fenomeen reppe mét gei woord euver hunne eder jaor trökkoumende vrund. Sterker nog ze weite neet ins boe die groete lui 't euver höbbe. Es ze nao 't Sinterklaasjournaal loere misse zie de kadookes bringer. Iech hoort e menneke rope dee waor aon 't loere; "Mamma höbbe de Zwarte Piete ziech versjörkke? Ze zien zoe wit!"

En dao steiste daan es Mam."Jao jong, d'r is onderweeg vaan Spanje nao Nederland netuurlek weer get gebäörd, boe ze erg vaan gesjörkke zien. Kiek mer, ze zien neet allemaol nog zoe wit. D'r zien 'rs al weer gans zwart....."! He,he, dao heet Mam ziech gelökkeg weer oet weite te praote. Wee wélt zie keend confronteren mèt dat veur die grummele neet te begriepen slaoveverhaol.

Want este dat zouws doen wat mooste daan mét dee kemeledriever vaan de Dreikeuninge astrein bij de Keersstal? En nog erger mét dee zwarte keuning ? "t Kin toch neet zoe zien dat dat fles ouch in de war weurt gesjik. En 't 'zwart' sjaop bij de herders. Is dee ouch slaof of zoe get, onder sjäöp..?

Maag Pa en/of Ampa tijdens 't maondelijks kaartävöendsje mét hun vrund ouch neet mie "Zwarte Piete"? en zeker neet boe de jongste kinder bijzien...Boerum gunne 'ze 'Pap en Ampa en de kinder neet dat plezeerke. De kinder rope Zwarte Piet, ze sjrieve Zwarte Piet, ze teikene Zwarte Piet, ze goon bij 'm zitte, ze zinge en speule mèt 'm in de hoop dat ze astrein e kedooke vaan 'm kriege en/of snópgood.



Daan is hunnen daag weer good en dee vaan alle mamma's en pappa's en neet te vergete de ama's en ampa's. Wee wélt de verantwoording numme um dat gelök vaan die grummelkes aof te numme. Inclusief de pekskesaovende boe Zwarte Piet akte de presence gief es keers op de toert? Este iemand wéls oetbeelde mooste dat wel zoe doen datste ouch alles deis um dee persoen oet te beelde zoe wie dee door 't leve geit. Oets 'ne slaof gezeen mét vuurroej lippe, mét oerbelle in, 'n prachtege barét mét pauweveer, 'n pófbrook, gekleurde of zwarte kouse, e sjeep vol kedookes en snópgood en es kindervrund dee lachend en zwejjend de kinder tegemoet treid en es 'baas' 'ne Bisjop dee super vruntelek de teikeninge vaan de kinder in oontvangs nump.

Eder associatie mét wat veur tiedperk in de wereldgesjiedenis daan ouch, geit maank.

Iech bin de veur dat de luikes die zich neet kinne vereinege mét dat fies; *Erger uuch neet, vier 't mét en laot eur kinder ouch genete. Dat is trouwens altied tijdens e fies.!!!Neet naodinke mer métdoen!!*

't Is toch neet te geluive dat bij de intoch vaan 'Sinterklaos, 't sjoenste kinderfies dat besteit de luikes via detectie-peurtsjes 't fiesterrein mage oploupe en 'n ganse pelitie-mach klaorsteit um de 'demonstrante' op te vaange.....2 0 1 6

OpaJam, foto's MestreechterSteerke.

Vaan 't AAJT nao 't NUI

't Aajdjaor verdwijnt, häögenisse blieve
Die hove veer neet op te sjrieve.
D'r is hiel vööl veurgevalle en gebäörd
Boedoor meineg minsehart is versjäörd.

'n Minseleve-zoe liekend 't- tèlt neet mie mèt
Zoe blik en steit te leze in eder gezèt
Luikes, opgejaog vaanoet hoes, dörp, en stad
Dao boe meinegein nog ziene touwkoms had

Ze koume in e wèlvtreemp land terech
Geit jaore dore veurdat ze dao zien gehech.
De minse liere kinne, hun gewoentes en cultuur
Wat lesteg is mer geit lökke, op d'n lange duur.

Dat mote veer hun in 't Nui Jaor zeker gunne
Mesjien wèlle ze hei 'n eige zaak goon runne
Of goon wèrreke op kentoer of in e febrik.
Eindelijk leve in e land zoonder konflik.

Edere mins op deez eerd heet rech dao-op
Gekleurd, blaank, mèt of zoonder kroezelkop.
Laote veer 't negatieve euver opvaank achter us laote
Dat is gewees, gein demonstraties mie in de straote

Allein nog mer PAIS en VREI, conform de
Keersgedachte
Laot ze neet nog daog, weke of maonde dao-op wachte
"E GELÖKKEG NUIJAOR" zien neet allein mer wäörd
In 't leve vaan al die minse is ech al genóg gebäörd!

E ZAOLEG EN GELÖKKEG NUI JAOR

